

LE LOÛ ÉT RARIVË

Adsair, monsieur Lapin a poûr d'aler ao cenâ. I vient qe de lére den son journa eune banie emayante ! LE LOÛ ÉT RARIVË !

Monsieu Lapin alit su l'us
vivement pour la cllencher
e la crouiller ben crouiller
cant d'un coup :
« DAO ! DAO ! DAO ! »
« Oh, Bondla ! Ét LE LOÛ !

« OUVERE !
OUVERE VITEMENT !
HÂTE-TAI !
Ét nous,
les trouéz petits pourciaos.
En grâce, monsieur Lapin,
lésséz-nous rentrer.
J'avons grand poûr.
LE LOÛ ÉT RARIVË.
« Entréz, mes amins,
entréz don », qe lous
dit monsieu Lapin,
soulaijë.

Sitôt l'us crouillë d'ertour qe :
« DAO ! DAO ! DAO ! »
« Hopela ! Vaici LE LOÛ ! »

« Ét mai, madame Biqhe, d'o mes 7 petits biqhets.
Je venons nous ramâsser céz tai.
T'as-ti oui la banie emayante ? LE LOÛ ÉT RARIVË ! »
« Entere don, ma bone amine, entere d'o tes petits »,
qe li repont monsieu Lapin, rassûrë.

Toute la menée s'anije e d'un coup :
« DAO ! DAO ! DAO ! »

« Ét-ti le loû q'êt a toqer de même ? »

« Ét mai, Petit Agnè.
Je taes a-bâs perche
le ruzè.
Més je ne peux pâs
me ramâsser.
LE LOÛ ÉT RARIVË ! »
« Haï don ! Entere don
Petit Agnè »,
qe li dit monsieu Lapin.
« Viens te rachaler. »

Petit Agnè s'anije perche la fouée de feu, meins d'un coup :
« DAO ! DAO ! DAO ! »

« Ste fai-ci ét LE LOÛ a tout coup ! »

« Ét mai, Pièrot. J'e pâs acoutë le Grand-Pere. Je vâs chacer le loû. Sav'ous-ti ?
IL ÉT RARIVË ! Vous le vayite-ti ? Ét-ti céz vous ? »

« Non, non fèt», qe li repont monsieu Lapin, « e j'ons bon espouèr de pouint
jamés le revaer. Més entere don, Pièrot. La bone erive a tai. »

Petit Pièrot va d'o les aotrs e d'un coup :
« DAO ! DAO ! DAO ! »

« Ét ventié le loû », qe huche le Pièrot vrai atainë.

« Ét mai,
le Petit Capichon rouge.

Ouvre-mai, Grand-Mere.
Je te porte de la
galette e eune petite potinée
de beûre. »
« Tu te trompes d'ôtë
Petit Capichon rouge »,
qe li dit monsieu Lapin.
« Ta grand-mere dejitit.
Més entere vitement.
Invencion de se pourmener
den le bouéz.
LE LOÛ ÉT RARIVÈ ! »

« E si qe je souperions ? »
qe velancit monsieu Lapin.
I treûent tertout qe l'idée ét
vrai bone e, ben vitement,
il apigochent un fricot
vrai goulayant.

Les amins pâssent a tabl cant d'un coup :

« BAOME !

BAOME !

BAOME ! »

« Tiens don ! », qe dit monsieu Lapin, la mine ebaobie.
« Je tions pus a esperer du monde ! »

Ét LE LOÛ. Il a les dents vrai vrai a perche !

Més sitôt qe le loû fét
eune enqhettée qe lapin,
pourciaos, bique,
biquets, agnè,
Pièrot e Capichon rouge
s'ebrivent su lu.

Le loû ét a-bâs e monsieu Lapin se met a caozer :
« LOÛ, J'ONS PUS POÛR DE TAI ! Mets ela den ta tête. »

Pés i dit core : « Més si qe tu promets d'étr boudet
e de nous conter des istoueres de loû qi font grand poûr,
aloure d'ela, je te perions a roucher cantë nous.

E ét come ela qe, le sair-la, entour d'eune tabl ben grayée,
céz monsieu Lapin,

LE LOÛ ÉT RARIVË !